



# Մկրտիչ Արսեն

## Բարոն

Չկա՞ ավելի գեղեցիկ կենդանի, քան ձին: Համաձայն եմ: Բայց չկա նաև ավելի տգեղ կենդանի, քան ձին: Դուք իսկույն կհամաձայնվեիք ինձ հետ՝ եթե տեսնեիք ճամբարի ձիերին: Ինչ լավ է, որ չեք տեսել: Ցանկանք, որ չտեսնեք հավիտյանս հավիտենից:

Նրանք ամեն օր չարչարվում էին անտառներում, կալանավորների հետ միասին: Եվ դեռ հարց էր՝ ո՞վ էր ավելի շատ չարչարվում:

Ամեն կողմ լսվում էին կացիների հնչյուններ, սղոցների խզզոց, ընկնող ծառերի խրշտոց: Եվ երբ ճյուղերից ազատվե՞ծ ու կտոր-կտոր արված ծառերը որպես պատրաստի գերաններ պատկում էին այս ու այն կողմում, հերթը հասնում էր ձիերին: Մոտենում էր ձիապանը, գերանը շղթայով կապում էր ձիու ետևից եւ քարշ տալիս անտառի միջով դեպի ճանապարհը, որը կարող էր լինել մոտիկ, կարող էլ լինել նաև հեռու:

Դուք ֆիզիկայից արդեն գիտեք, թե ինչ բան է շփումը: Եվ ահա, եթե նույն ձիու համար շատ դժվար չէր լինի տանել շատ գերաններ՝ անիվներ ունեցող սայլակներով, ապա շատ ու շատ դժվար էր՝ գետնով քարշ տալ միայն մի գերան: Եվ այն էլ ի՞նչ գետնով: Մացառների ու խոտի մեջ թաքնված ծառարմատները կառչում էին գերանի ոչ այնքան մաքուր կտրված ճյուղերին, պահում գերանը:

Ձիապանը, առանց հասկանալու պատճառը, գուցե եւ հասկանալով, բայց գայրացած՝ աշխարհի վրա, արդարության վրա, շուտ էր գալիս եւ ծեծում խեղճ ձիուն, ծեծում, ծեծում...

Դուք պիտի տեսնեիք նրա ձիային աչքերի մարդկային տանջալի արտահայտությունը, լսեիք նրա ձիային ռունգերից ելնող մարդկային արագ-արագ ու ծանր շնչառությունը: Իսկ երբ հանկարծ նա իր տխուր աչքերը բարձրացնում էր դեպի քեզ, կարծես ասում էր մարդկային լեզվով . «Ինչո՞ւ ես ծեծում ինձ, ես էլ կալանավոր եմ քեզ նման...»...

Ի՞նչպես էր ձգվում ձին՝ պոկելու համար գերանը գետնից, ի՞նչպես էր լարվում նրա նիհար ու ոսկրոտ մարմինը՝ ամբողջապես բաղկացած փոսերից ու սուր գցվածքներից:

Իսկ մոռ՛ւթը... Իսկական ձիու մոռու՞թ՝ ինչպես երբեմն ասում ենք՝ հայիոյելով մարդկանց: Ատամները՝ իսկական ձիու ատամներ՝ երկար, դեղին: Երբ նա բաց էր անում մագնգուկներով ծածկված իր տգեղ, կախ ընկած շուրթերը, նրա ատամները թվում էին ձիու մերկ գանգի ատամներ...

Երբ վերջանում էր աշխատանքային օրը եւ, վերջապես, լծարձակում էին նրանց, այսինքն՝ քանդում էին նրանց վրայից շղթաները, խեղճերն ուժ չէին ունենում մեկնելու դեպի հանգիստ: Երկարում էին իրենց նիհար վզերը, մատղաշ եղենիներից պոկում մի փունջ փշատերեւ, ծամում զգվանքով ու դանդաղ, եւ, որքան էլ որ սոված, այլեւս չէին պոկում երկրորդ փունջը:

Բայց ճամբարում կար նաեւ մի շատ գեղեցիկ ձի, նժույգ: Իսկապե՞ս Բարոն էր անունը, թե՞ կալանավորներն էին այդպես կոչում նրան: Դա ճամբարի պետի ձին էր: Համարյա սեւ գույնի, խոշոր, նա ուներ բարեկազմ, բայց շատ կուշտ կազմվածք, ներդաշնակ, բայց հսկայական գավակ, ավելի ճիշտ կլինի ասել՝ հետույք: Նրա մկանտոս ու լավ սնված մարմինը ներսի կողմից այնպես էր պրկել կարճամազ մաշտը, որ վերջինս փայլում էր՝ նմանվելով մուգ շագանակագույն բադրիչանի կեղեւի:

Ինչպիսի՞ գեղեցիկ գլուխ ուներ նա՝ բարձր դրվածքի պարանոցի վրա... Մոսձիգ ռունգերը թրթռում էին ջահել ու առնական, խոշոր ու կրակոտ աչքերը վառվում էին չծախսած ուժից ու տեմպերամենտից:

Կալանավորները հաճախ էին տեսնում նրան՝ ճամբարի պետի սայլակին լծված: Սայլակը շատ փոքրիկ էր, մի մարդու համար, ձվի կճեպի նման թեթեւ էր ու կանոնավոր, երկու մեծ անիվների վրա:

Տեսն՞լ եք, թե ինչպես չար երեխաներն իրենց ընկերներից մեկի ետեւից կապում էին թղթի կտոր՝ ծիծաղելու համար: Երեխան վազվզում է, խաղում՝ առանց զգալու այդ թղթի կտորի գոյությունը: Ահա ճիշտ այդպես էլ Բարոնն իր համար ազատ եւ ինքնիշխան վազում էր ճանապարհով՝ բոլորովին չզգալով, թե ինչ որ քան են կապել նրա հսկայական հետույքից:

Երբ կալանավորներն անտառային երկար ճանապարհից վերադառնում էին ճամբար, նրանք հաճախ տեսնում էին Բարոնին նաեւ ախտոների մոտ, դրսում կապված, գարի ուտելիս:

Տեսնելով գլխակախ քայլող կալանավոր ձիերի նիհար ու տգեղ կերպարանքները, Բարոնը վեր էր բարձրացնում գլուխն իր գարու վրայից եւ կրքոտ խրխնջում: Բայց նրա խրխնջը, կուշտ փորից եկած, արձագանք չէր գտնում ոչ մի ձիու մոտ: Նրանք չէին էլ նայում Բարոնի կողմը: Անշատվելով մարդկալանավորներից, նրանք անցնում էին պորտաբույծի մոտով՝ առանց անգամ նայելու նրա գարուն, հասկանալով, որ դա նրանց համար չէ: Մտնում էին իրենց ախտոր՝ ուտելու իրենց մի կտոր խտոր:

Բարոնը չէր հանգստանում: Ուտելուց կշտացած, նա ուզում էր զվարճություններ, խրխնջում էր եւ խրխնջում: Գլուխը ցնցելով փորձում էր պոկել երասանակը եւ մտնել ախտոր՝ ինչպես սուլթանը կմտներ հարեն:

Իր փոքրիկ տնակից դուրս էր գալիս ինքը՝ ճամբարի պետը, թփթփացնում էր նրա բարձր պարանոցը, փորձում էր հանգստացնել նրան: Բայց Բարոնն անթարթ նայում էր դեպի հարեւան ախտոր եւ վրնջում, կարծես ասում . «Արձակ թողեք ինձ, մի ցույց տամ դրանց»...

Համարյա ամեն օր կալանավորներն ականատես էին լինում այդ տեսարանին: Ու թեեւ հոգնած, նրանք աշխուժանում էին մի փոքր եւ սկսում սրախոսել: Արտաքնապես պատկերն այն էր, թե նրանք, ծեծելով, ասում էին իրենց ձիերին,

եւ, ընդհակառակը, գվարճանալով Բարոնով, սիրում էին նրան: Բայց իրականում բոլորովին հակառակն էր: Ձիերին նրանք ծեծում էին այնպես, ինչպես կծեծեին իրենք իրենց՝ եթե կարողանային . վշտից, դառնություններից, հուսահատությունից: Իսկ Բարոնով նրանք գվարճանում էին ինչպես դատարկապորտով, որը, արտոնյալ նժույգ, չի տեսել կյանքի ոչ մի դառնություն եւ միշտ պահանջում է նորանոր գվարճություններ: Կալանավորներն իրենց հոգու խորքում սիրում էին իրենց ձիերին եւ ասելով ասում այդ հղփացած Բարոնին:

Մի անգամ, վերջապես, Բարոնին հաջողվեց պոկել իր երասանակը: Ինչպիսի՛ հրճվանքով ու մոտակա բավականության նախաճաշակումով նա նետվեց դեպի տզեղ ու քաղցած ձիերի ջոկը... Խելահեղ ուրախությունից նա չգիտեր ուրին ընտրել, ուզում էր բոլորին վայելել միաժամանակ: Ապա, առանց ընտրության, հարձակվեց դրանցից մեկի վրա:

Ձին, աշխարհի վայելքները վաղուց ի վեր մոռացած, սկզբում չհասկացավ, թե ինչ են ուզում նրանից: Ապա հավաքեց իր վերջին ուժերը եւ գույգ ոտքերով մի ուժեղ քացի տվեց Բարոնի փորին:

Կալանավորները բարձրացրին ուրախության վայրենի աղաղակներ:

Բարոնը վրնջաց ցավից, բայց առավել եւս՝ այդպիսի անհավատալի եւ կոպիտ մերժումից: Երեւի նա կյանքում չէր տեսել այդպիսի բան: Բայց ձիերն արդեն մոտենում էին ախոռի դռանը, հարկավոր էր շտապել: Ուստի եւ նա, առանց հապաղելու հարձակվեց մի ուրիշի վրա: Ձին ետ տարավ իր կախ ընկած հաստ շորքերը, դնճրտաց շան նման եւ անսպասելի արագությամբ շուռ գալով դեպի Բարոնը, իր երկար ատամների երկու շարքը խրեց նրա մսի մեջ եւ հանեց: Ուժեղ ցավի խրխինջը խլացավ ցնծության աղաղակների մեջ: Կծած տեղում իսկույն հայտնվեցին երկու շարք կարմիր, խոշոր ուլունքներ, որոնք, իսկույն էլ, փխլվեցին ու հոսեցին ներքե:

Նույն վայրկյանին կատարվեց մի անհավատալի բան: Բոլոր ձիերը՝ տզեղ, նիհար, հոգնած, շուռ եկան, հարձակվեցին Բարոնի վրա եւ սկսեցին բոլոր կողմերից կծոտել նրան եւ խփել քացիներով:

Ոչ ոք դեռ ուշքի չէր եկել, երբ իր տնակից դուրս նետվեց ճամբարի պետը եւ հարձակվեց ձիերի վրա: Մտրակով անխնա հարվածելով աճ ու ձախ, նա փրկեց ոտից գլուխ արյունոտված եւ սմբակների հետքերով նախշված Բարոնին Ձիերը մտան ախոռ:

Սրիկաներ, ես ձեզ ցույց կտամ, գոռաց ճամբարի պետը՝ խոսքն ուղղելով, սակայն, ոչ թե ախոռ մտած ձիերին, այլ զվարճությունից փայլող աչքերով կալանավորներին: Կանգնել եւ հռհռում էիք, այո՞, փոխանակ ազատելու ձիուն այդ սրիկաների ձեռքից:

«Սրիկաներն» այս անգամ արդեն վերաբերում էր ձիերին:

Քանի որ ընդունված բան չէր՝ ձիերին տանել մեկուսարան, պետը հրամայեց այդ պատժին ենթարկել կալանավորներին:

Առանց մտնելու իրենց բարաքը, հենց ճամբարի դարպասի մոտից, նրանք իրենց քայլերն ուղղեցին դեպի ցուրտ մեկուսարան: Հենց այնտեղ էլ ստացան իրենց ընթրիքը եւ խմեցին: Բայց զվարթ խոսակցությունները չէին լուծում մինչեւ ուշ գիշեր: Պատմում ու վերապատմում էին պատահած դեպքի բոլոր մանրամասնությունները, լրացնում իրար, ուղղում, վիճում, բարկանում իրար վրա, համաձայնվում:

Իսկ առավոտյան, նորից գնալով անտառ, նրանք սկսեցին նորից ծեծել իրենց ձիերին, թե ինչի համար են նրան ծնվել այդքան դժբախտ, ինչի՞ համար են եկել այստեղ՝ մարդկանց հետ կիսելու նրանց մարդկային ճակատագիրը...